

mandò a oferir ducati 15 milia, di quali ne portò in oro ducati 12 milia e promete doman portar il resto. Sier Piero da cha' da Pexaro mandò a oferir ducati 10 milia, di quali ne portò in oro ducati 5000 et promete portar doman il resto. Sier Jacomo Soranzo offerse ducati 12 milia, di quali portò in do sachi di moneda venetiana ducati 10 milia e promete portar doman il resto.

Sier Alvise Pasqualigo offerse ducati 13 milia e promete darli doman tutti.

Sier Marco Grimani offerse ducati 16 milia, de quali ne portò contadi in oro ducati 13 milia e promete doman darli il resto.

Et cussi mandati tutti fuora, questi quatro remasti a rebotar, numerato il Consejo, fono 1696 oltra li quatro parentadi cazadi; che fo puoco numero, al gran numero di zentilhomeni che semo, che ponno venir a Consejo.

*Rebotadi Procuratori di la chiesa
di san Marco*

1696

† Sier Jacomo Soranzo, fo al luogo di Procurator, qu. sier Francesco	937. 766
Sier Alvise Pasqualigo fo Cao dil Consejo di X qu. sier Filippo	643.1057
Sier Francesco Corner el cavalier, fo Consier, di sier Zorzi cavalier, pro- curator.	823. 930
Sier Marco Grimani qu. sier Hironi- mo dil Serenissimo	840. 861

È da saper: Fo prima publicà per Gasparo di la Vedoa, fà l'oficio di Canzelier grando, chi voleva venir a zonzer imprestado venisse avanti si principiasse a ballotar, che seriano acceptadi.

Et sier Marco Grimani azonse altri ducati 2000, in tutto 18 milia.

Sier Francesco Corner el cavalier, azonse altri ducati 2000, in tutto 17 milia.

Sier Jacomo Soranzo azonse altri ducati 2000, in tutto 14 milia.

Sier Alvise Pasqualigo azonse altri ducati 1000, in tutto 14 milia.

Et cussi rimase sier Jacomo Soranzo, e chiamato a la Signoria, li fo tochatò la man e fatoli aprir il Consejo aziò vadi a casa, et li Procuratori justa il solito lo aspetono in chiesa di san Marco et lo acompagnono a casa; et restò Gran Consejo a ballotar il resto di le voxe qual tutte passoe.

55* *Di Campo, vene letere, hessendo Gran Con-*

sejo suso, date a Binasco, dil proveditor Gritti e sier Polo Nani, di 23, hore 3. Come, hessendo zonto monsignor di Lescut a mia 20 da Pavia et preso il borgo et brusato, par che uscisse da Pavia 200 lanze et 3000 fanti per esserli a l'incontro; il che inteso monsignor di Lutrech havia mandato contra et in soccorso dil ditto suo fratello 200 lanze soe et 100 nostre et 3000 sguizari et 1500 fanti italiani, sichè, trovando inimici ussiti di Pavia, sariano a le mano. *Item*, scrive altre particolarità e solecita il mandar di danari, etc.

Fu chiamato sier Mathio Malipiero camerlengo di comun a la cassa, et datoli li ducati 10 milia di sier Jacomo Soranzo rimasto Procurator, qual vadi con uno di soi a l'oficio a contarli.

Noto. In questo Consejo vene domino Antonio da Martinengo, citadin brexan e zentilhomo nostro. *Item*, vidi sier Jacomo d'Armer di sier Alvise vestito di beretin, qual fu ferito mortalmente da sier Lorenzo Sanudo in Rialto et è varito.

Fo mandato in questa sera in campo ducati 6000 in oro contracambiati con quelli dil loto e datoli la moneda dil Procurator novo a l'incontro, il qual poi cambierà o conzerà li danari per far il sazo, per esser di zecha.

A dì 17. La matina, vene in Colegio sier Jacomo Soranzo electo Procurator vestito di veludo cremesin alto e basso di dossi, acompagnato da sier Antonio Trun, sier Domenego Trivixan cavalier, sier Zorzi Corner, sier Lorenzo Loredan, sier Hironimo Justinian e sier Alvise Pixani procurator. Manchava sier Andrea Gritti è fuora, sier Zacaria Gabriel e sier Alvise da Molin è amalati, e altri soi parenti e compagni, di seda e di scarlato. Il qual ringraziò il Principe, oferendosi meter le facultà, la persona e la vita a beneficio di questo Stado. Il Doxe li dè le chiave di la Procuratia, e li disse facesse portare il resto di danari promessi.

Di Spalato, di sier Marco Antonio da Canal conte e capitano, di 10 di l'istante. Come havea per soi mandati, che il sanzacho di havia fato apichar do feva danni sul teritorio di la Signoria nostra. *Item*, che era venuto comandamento dil Signor, che tutti stesseno in ordine, che al secondo comandamento cavalcasse a la Porta. *Item* si dice che 'l preparava armata, et havia mandà per homeni da meterli suso.

Da poi disnar, fo Consejo di X con la Zonta et 56 fu il Principe, nè fu letera alcuna.

Fu preso di acceptar le oblation di 12 zentilhomeni quali hanno oferto prestar ducati 500 a la Si-